

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



IANUARI - IUNI

2026



Saunia : Ofisa o A'oa'oga Kerisiano

EKALESIA FAAPOTOPOTOGA KERISIANO I AMERIKA SAMOA

TUSI AOGA ASO SA



IANUARI - IUNI

2026



Saunia : Ofisa o A'oa'oga Kerisiano

VASEGA FEOLOLO - FA'ASOLOGA O MATAUPU
FEPUARI 01, 2026 – IUNI 22, 2026

<u>ASO/MASINA</u>	<u>MATAUPU</u>	<u>TUSI FAITAU</u>
1. Fepuari 01, 2026	'Ua tulia Akara ma Isamaeli'	Kenese 21:8-19
2. Fepuari 08, 2026	'Ua ave Isa'ako e osi ai le taulaga"	Kenese 22:1-14
3. Fepuari 15, 2026	"O le oti o Sara ma Apera'amo"	Kenese 23: 1-9/25:7-10
4. Fepuari 22, 2026	MATAUPU FA'AMANATU	
5. Mati 01, 2026	"Ua inosia Iosefa e ona uso"	Kenese 37: 5-11
6. Mati 08, 2026	"Taupulepule e fasioti"	Kenese 37: 12-24
7. Mati 15, 2026	"O le fa'asaoina/faaolaina Iosefa e le Atua"	Kenese 37: 25-28
8. Mati 22, 2026	"O Iesu le lavea'i sili o tagata uma"	Eperu 3: 1-19
9. Mati 29, 2026	"O le taulaga e tasi mo tagata uma" (Aso Sa Laupama)	Eperu 10:1-18
10. Aperila 05, 2026	"Tapena se faatinoga mo le Toetu" (Aso Sa Eseta)	
11. Aperila 12, 2026	"O le poloaiga sili a Iesu Toetu"	Mataio 28: 11-20
12. Aperila 19, 2026	"Ua a'oa'o mai Iesu i le Tatalo"	Luka 11: 1-13
13. Aperila 26, 2026	MATAUPU FA'AMANATU	
14. Me 03, 2026	"O le Faamalologa i Petesa"	Ioane 5: 1-18
15. Me 10, 2026	"E tupu vavega i le Fa'atuatua o Tinā" (ASO SA O TINĀ)	Mareko 7: 24-30
16. Me 17, 2026	"O le Fa'asoesā aogā o le Tinā"	Luka 18: 1-14
17. Me 24, 2026	"E le faa'tauina i tupe le Agaga Paia" (ASO SA PENETEKOSO)	Galuega 8:14-24
18. Me 31, 2026	MATAUPU FA'AMANATU	
19. Iuni 07, 2026	"O le Fa'aaliga na iloa e Peteru"	Galuega 10: 9-16
20. Iuni 14, 2026	"O le Manuia o e ola i le Agaga Pa'ia" (ASO SA O TAMĀ)	Roma 8: 1-8
21. Iuni 21, 2026	"Tau o Iesu e naunau i ai"	Filipi 3: 12-16
22. Iuni 28, 2026	SU'EGA 'AFA MUAMUA O LE TAUSAGA – 2026	

ASO SA: FEPUARI 01, 2026
MATAUPU: "Ua tulia Akara ma Isamaeli."

TUSI FAITAU: Kenese 21:8-21

TAULOTO: Kenese 21:13. O le tama foi a le fafine pologa, ou te fai o ia ma tupuga o se nu'u, auā o lau fanau ia."

SINI: Ia malamalama fanau i le fa'amoemoe ma le pogai na o ese ai Akara ma Isamaeli

FESOASOANI MO LE FAIAOGA: Ua tatou iai i le amataga o lenei Tausaga Aoga fou 2026. E fa'atalofa atu ai, ia outou Susuga i Faiaoga, malo le soifua manuia ma le lagi e mamā, talitonu ua maua se fa'asiliga-malosi o le tino, mafaufau ma le agaga mai i malologa sa feagai ai ma aso fīafīa ua tuanai atu nei. E iai le manatu, e lelei ona amata e le isi Faia'oga le fa'afeiloa'iga o fanau a'o gasolo atu. Ia amata lava i ni nai pesepesega e fa'aala ai pe fa'aosofia ai fo'i le fīafīa i nai fanau i le a'oga i lenei Aso Sa muamua o le Aoga. E lelei le filifili o ni pese e feso'ota'i ma le lesona, ina ia saga fa'amautu atili ai le tala ma le a'oa'oga o le a fa'alogo i ai fanau. O se mataupu taua lenei mo tatou auā e i ai pea tamaiti i totonu o o tatou aiga, totonu o nuu, totonu o aoga, ma totonu o a tatou aulotu. E lelei foi lo tatou malamalama lelei i le mataupu lenei auā o taimi uma lava tatou te mulimuli ai i le fa'asinoga a le Tusi Paia i le fa'afaileleina o a tatou fanau. E maualuga le fa'amoemoe ua lava saunia a outou Susuga i Faiaoga, mo a tatou lesona o lenei Tausaga. O nai fa'amanatu lava, ae taofi ua nofofale i o outou finagalo tapenaga mo le galuega. Ua na o se alafua a le Ofisa e tatala ai la outou tapenaga, ae ua taoto atu ia outou Susuga le tele o metotia e faatinoina ai le a'oa'oina o lesona mo nai fanau. Manuia le galuega amata i lenei Aso Sa mo nai fanau. God Bless!!

FESOASOANI MO LE MATAUPU: O le tala sa tatou faitauina, o lo'o manino mai le tina o Akara ma lana tama ua tuli eseina mai le aiga. O tamaiti, o tagata ola foi na foafoaina e le Atua ma foaiina mai i matua e faafaileleina ma tausi, ia a'oa'oina ma atia'e, ina ia aoga mo le finagalo o le Atua i le lumanai. O lona uiga, e taua tele la tatou le fanau a ea? Ioe, E tusa ai ma le vaai faa-le Tusi Paia, o tamaiti o meaalofo ma mea totino a matua mai le Atua. E le'i ala ona tutupu mai tamaiti ona o se ma'ema'e o matua. E leai. O fanau, o mea totino ia a le Atua ua fa'a-mealofo mai i matua. O i latou o tofi mai le Atua soifua. O le eseeselea o le manatu o Sara le to'alua o Aperamo ma le finagalo o le Atua. Na manatu lava Sara ia, o tamaiti o se mea e fau i manao ma lagona o le tagata ola. O le mea lea na ala ai ona manatu Sara, ina ua lo'omatua o ia, ai ua pasi ia ma le avanoa e maua ai sa la fanau ma Aperamo. O lea na ia fa'atonu ai Aperamo ina ia fai'aiga ia Akara lana auauna fafine ia maua ai se fanau ma Aperamo. Lea la na tupu mai ai le tama o Isamaeli. O lea foi la ua foai mai e le Atua le tama o Isaako ia te ia e pei ona folafolaina e le Atua ia Aperamo, a o lea foi ua manatu Sara, ua tataua ona tutuli ese Isamaeli ma lona tinā mai totonu o lona aiga. A silasila lelei lava i le gasologa o le tala, o se faiga aupito agaleaga lea ua fai e Sara ia Isamaeli ma lona tinā. Ae pe la ea e i ai se mea sesē a Isamaeli ua fai. Ae aiseā ua fa'atete'a ai Isamaeli ma lona tamā mo'i o Aperamo?

Ae a tutuli nei si tamaititi ma lona tinā o fea a o i ai, o lea sa nonofo o ni pologa, ma e leai se aiga e o i ai. O lea foi la ua o na o ni nai mea'ai ma le fagupa'u vai, po'o fea a maua ai ni mea'ai e a'ai ai i le ala.

E foliga mai o le va'ai a Sara, o le va'ai manatu fa'apito ma le lē alofa i fanau. Ta'atia ia sona lagona fuā ia Akara, ae o Isamaeli lava ia o lona aiga lea ma lona tofi lea, a o lona tamā lea e nofo ai. O i e maua ai lona

saogalemu ma lona olioli moni, o le aiga o lona tamā o Aperā'amo. E to'atele tamaiti o lo'o afāina o latou ola e pei ona afāina le tamā o Isameli. A silasila i le fa'alavefau a le Atua i lea ituaiga afāina lea na o'o i ai le olaga o Isamaeli, o lea la ua fai e le Atua le fa'aolataga mo Isamaeli ma lona tinā. E le gata i lea ae ua na faia foi le folafolaga i le avea o Isamaeli ma tupuga o nu'u e tele. Ioe fanau, o outou o tofi sa faimeaalofa mai ai le Atua i o outou matua. A o le mafua'aga lea na ala ai ona o ese Akara ma Isamaeli mai le aiga o Isamaeli. Ua le fiasia Sara ona ua fanau mai lana tama o Isa'ako. E musu e tausii lua Isa'ako ma Isamaeli i totonu o lona aiga. Peita'i, e le o le finagalo lea o le Atua, o le Atua o le Atua alofa ma agalelei i fanau e iai foi ma tatou uma. Ia manuia outou le fanau... Amene.

FESILI:

- Aiseā na o ese ai Akara ma Isamaeli mai le aiga o Aperā'amo?
Ua tutuli ese i la'ua e Sara le to'alua o Aperā'amo
- O le a se fa'amanuiaga sa foai e le Atua ia Isamaeli?
E fai ia ma tupuga o nu'u e tele
- O le a se a'oa'oga ua e maua mai le tala i lenei taeao?
(tu'u le avanoa mo nai fanau e fa'asoa ane ai)

PESE: O le Atua e tele, e malosi mata'utia, e leai se mea e faigata ia te ia.

Ia manuia lenei Aso Sa

ASO SA: FEPUARI 08, 2026
MATAUPU: "Ua ave Isa'ako e osi ai le Taulaga."
TUSI FAITAU: Kenese 22: 1-14
TAULOTO: Kenese 21:18. "O le tama foi a le fafine pologa, ou te fai o ia ma tupuga o se nu'u, auā o lau fanau ia."

Sini: Ia malamalama fanau i le taua o le fa'alogo ma usita'i i le Atua, e pei o Aperā'amo ma Isa'ako.

FESOASOANI MO LE FAIAOGA: Mālo le soifua manuia ia outou Susuga i Faiaoga, fa'afetai i le Atua ua maua se malosi e fa'aauau ai o tatou tiute ma faiva mo le galuega.

Ae alo ane loa mo a outou tapenaga mo nai fanau ma lo latou fia fa'alogologo pea i tala o le Atua ma lona alofa lavea'i, lea sa fa'asaoina ai le ola o Isa'ako. E iai le talitonuga ua na o se amataga, ae taoto atu ia outou Susuga i se atoaga e atoa ai le lesona mo nai fanau o lo'o outou mafuta. A e manatu e lelei fo'i ona toe fa'aauau a outou matāfaioi masani e pei o le Aso Sa ua tuana'i atu; Fa'afeiloa'i, tusi le sene e le isi uso a Faia'oga, ae sauni loa le isi uso a Faia'oga, mo le tatalo amata, toe faamanatu le lesona ua tuana'i, soso'o ai lava ma le lesona o lenei Aso Sa; **Ua ave Isaako e osi ai le Taulaga.** Ia fa'amanuia atu le Atua i a outou Susuga ma tapenaga uma. God Bless!

FESOASOANI MO LE MATAUPU: A silasila i le tala i le osiga o le taulaga a Aperamo na fa'atonuina e le Atua ina ia ave Isa'ako e osi ai le taulaga, e le o le finagalo o le Atua ina ia osi i tamaiti ni taulaga. E leai. O le finagalo o le Atua se'ia tofotofoina le fa'atuatua ma le ususita'i o Aperamo, pe fa'amaoni ma alofa Aperamo i lona Atua. Ioe, sa faa'maoni lava Aperamo, ina ua fetalai le Atua, e ave Isa'ako lona atalii, e osi ai le taulaga. O le mafua'aga lea na toe sui ai lava e le Atua Isa'ako i le mamoe e osi ai le feagaiga ina ua mautinoa, o Aperamo o se tagata fa'amaoni lona alofa ia te ia. Ioe fanau. Fai mai le fetalaiga a le Atua; "Aperamo ou te mana'o e ave Isa'ako lou atalii, le e pele ma sili ona e alofa iai, i le nu'u o Moria e fai ai le taulaga mo a'u." Sa matua i faigata ia Aperamo ona talitonu i nei upu faigata ma le matuitui. Ae pe moni ea le finagalo o le Atua na te fasioti lona atalii, ae a fa'apefea ana folafolaga? Peita'i, sa a'oa'oina Aperamo e tu'u lona fa'atuatua i le Atua ma usita'i ia te ia. Le ala lea na la o atu ai loa i le segisegi o le taeao. O Isa'ako sa ave fafie, a o Aperamo o le naifi ma malala e fa'amumū ai le afi. E tolu aso o alu le malaga. Sa faigata ia Aperamo ona mafaufau i le taunu'uga o le malaga ma le mea o le a tupu, sa ia le faia foi se upu ia Isa'ako. A o aga'i le malaga ma ua tau lalata atu i le nofoaga e fai ai le taulaga, ona fesili ane lea o Isa'ako ia te ia. Tamā e, ua iai fafie, ma le afi e fai ai le taulaga, a o fea se mamoe? Isa'ako, e aumai e le Atua le mamoe. Ina ua taunu'u i le nofoaga e fai ai le taulaga, sa fau le fata faitaulaga ma fa'atietie loa fafie, ona tago atu lea o Aperamo, ua saisai lima o Isa'ako ma fa'ata'atia i luga o le fata faitaulaga. Na ia si'i i luga le naifi o le a ia fasioti lona atalii, ae fetalai ane loa le Atua ia te ia. Aperamo! 'aua 'aua e te pa'i i le tama, ua ou iloa nei le tele o lou fa'atuatua ia te a'u, va'ai ane i ou tua o lo'o lavelavea ai le mamoe po'a, ia osi ai le taulaga" Ua fa'asaoloto e Aperamo lona atalii, ua la fa'afetai i le Atua ma le olioli, ona la'ua avane ai lea o le tama'i mamoe po'a, ua osi ai le taulaga i le Atua. Sa toe fa'afouina e le Atua ana folafolaga ma ana fa'amanuiaga ia Aperamo, ona o lona usita'i ia te ia, e ave lona atalii o Isa'ako e fai ma taulaga mo ia. Ioe, le fanau e, O manuia ia a o'o ina fausia ai olaga o outou le fanau ona avea lea o outou o ni mea faigaluega ua saunia lelei mo le lumana'i, mo le finagalo o le Atua. Ia manuia outou le fanau.. Amene.

FESILI: .

- E iai se upu sa tali ai Aperamo i le Atua ina ua fa'atonuina e le Atua e fai atu le taulaga ia Isaako? E leai se upu sa tula'i lava ma usita'i atu i le fa'atonuga a le Atua
- Aiseā na le osia ai le taulaga ia Isa'ako? Na saunia e le Atua le mamoe e osi atu ai le taulaga ia te Ia.
- O le a se a'oa'oga taua ua e maua mai le tala sa tatou fa'alogo iai i lenei taeao? (tu'u le avanoa i fanau).
 - Faaopoopo ane e lau Susuga nisi fesili faigofie mo le fanau faamolemole.

PESE: Fa'alogo ma usita'i e leai se ala e fiafia ai Iesu.

Ia manuia lenei Aso Sa



ASO SA: FEPUARI 15, 2026

MATAUPU: “O le oti o Sara ma Apera’amo.”

TUSI FAITAU: Kenese 23: 1-9/ Kenese 25: 7-10

TAULOTO: Kenese 21:18. “O le tama foi a le fafine pologa, ou te fai o ia ma tupuga o se nu’u, auā o lau fanau ia”

Sini: Ia iloa ma malamalama fanau, e le’i tu’ulafoaiina e le Atua ona tagata e pei o Apera’amo ma Sara.

FESOASOANI MO LE FAIAOGA: Fa’atalofa atu ia outou Susuga i Faiaoga mo le amataina foi o a outou tapenaga mo la tatou pito-la’au aua le a’oa’oina o nai fanau a le nu’u ma le Ekalesia. E iai le manatu ia lava se taimi e tatou te saili fa’atasi ai mo lenei lesona taua e pei ona tatou fa’aauuina mai le tusi faitau o lenei masina. Ae iai foi le manatu e fa’aauu pea tofiga mo a outou Susuga i Faia’oga mo le amataina o le vasega. Ua manatu e toe fa’aaoga mai le tauloto a fanau i Aso Sa ua tuana’i atu, ia mafai ai pea e i latou ona tauloto mai mau o le tusi pa’ia. Afai foi e silafia e vave ona maua le fanau, aua le taofia le suiga o se isi tauloto fa’amolemole, mai a tatou tusi faitau. Manatu na o se amataga, e tau tata’i ai la outou tapenaga, ae taoto atu lava ia outou Susuga, e fa’atino ane lava i la outou alāfua, e masani ai ina ia faigofie ai i nai fanau la latou fa’alogo mo a tatou lesona. Ia manuia tele a outou tapenaga mo lenei Aso Sa. God Bless!

FESOASOANI MO LE MATAUPU: O le tatou lesona i lenei taeao ***O le oti o Sara ma Aperaamo*** Fai mai le tala e 127 tausaga sa soifua ma ola ai Sara, ona maliu ai lea o ia i Kiriata-arapa o Heperona i le nu’u o Kanana. Sa matua i tagitui lava Apera’amo, ona o le oti o Sara lana ava. O le mafua’aga lea na fai atu ai loa Apera’amo i luma o le fanauga a Heti, o ia o le tagata ese, o le tagata aumau ia te outou; ia outou fa’asino mai se vaega o lo outou fanua, ou te saunia ai se tu’ugamau mo Sara si o’u toalua. Ioe le fanau e, fai mai le tali a le fanauga a Heti ia Apera’amo. O le alii tele oe ia te i matou. Ia e tanu lou faletua ua maliu i so matou tu’ugamau e sili ona lelei, ma e leai lava se tasi o i matou e vavao atu sona tu’ugamau mo lou faletua ua maliu. Ia ua tatou va’ai la i le lelei o le Atua, aemaise ai o galuega lelei sa fa’atino e Apera’amo ma Sara, e le gata i le tautuaina o o la’ua Aiga, a o le finagalo o le Atua mo la’ua ina ia mulimuli i ala sa fa’asino atu e le Atua e la’ua te manuia ai.

Fai mai le tala e 175 tausaga sa soifua ma ola ai foi Apera’amo, ona to ai lea o lana manava, ma ua oti o ia, ua matua i toeaina lava. Manatua foi outou le fanau e to’alua le fanau a Apera’amo, o le tama o Isamaeli ma Isa’ako, fai mai o tama ia na o la ave lo la tamā o Apera’amo ma tanu fa’atasi ma Sara i le ana o Makapelu i le fanua o Eferoma le atalii o Soaro. O le fanua sa faatauina mai e Aperaamo mai le fanau a sa Heti. O le fanua lea e iai le ana lea ua tanu ai Apera’amo e lana fanau, o le ana foi lea sa tanu ai e Apera’amo Sara, ina ua maliu o ia. Ioe, e le tu’ulafoaiina e le Atua ona tagata sa fa’atuatua ma talitonu i lona finagalo. Ia manuia tele outou le fanau. Amene.

FESILI:

- E fia tausaga o Sara ae maliu loa?
E 127 tausaga o Sara sa ola ai
- E fia tausaga sa ola ai Aperaamo?
E 175 tausaga sa ola ai Aperaamo
- O a ni a'oa'oga taua ua e maua mai i le tala sa fa'amatalaina i lenei taeao?
(Tu'u le avanoa e faasoa mai ai nai fanau).

PESE: Ua ou filifili e mulimuli ia Iesu.

Manuia lenei Aso Sa

ASO SA: FEPUARI 22, 2026
MATAUPU: MATAUPU FA'AMANATU - MATAUPU - 1,2,3:

FESOASOANI MO LE MATAUPU:

Fa'atalofa atu ia outou Susuga i Faiagoa i le fa'aiuga o lenei masina. Manatu o lea ua avatu se fa'ata'ita'iga mo a tatou fesili mo nai fanau, ae o fesili na sa tu'uina atu mo a tatou lesona sa fa'atinoina, peita'i, ua tu'uina atu lava ia outou Susuga, ina ia fai ane ni a tatou fesili ia o gatasi ma a outou tapenaga sa feagai ai ma nai fanau. Ia manuia tele le feagai ai ma Su'ega a fanau mo lenei Aso Sa. God Bless!

FESILI:

1. Aiseā na o ese ai Akara ma Isamaeli mai le aiga o Aperaamo?
Ua tutuli ese i la'ua e Sara le toalua o Aperaamo
2. O le a se faamanuiaga sa foai e le Atua ia Isamaeli?
E fai ia ma tupuga o nuu e tele
3. O le a sou lagona pe ana o oe lea ua tuli ese mai lou Aiga?
Tatalo i le Atua mo se isi fa'asinoga mo oe ma lou lumanai
4. E iai se upu sa tali ai Apera'amo i le Atua ina ua fa'atonuina e le Atua e fai atu le taulaga ia Isa'ako?
E leai se upu sa tula'i lava ma usita'i atu i le fa'atonuga a le Atua
5. Aiseā na le osi ai le taulaga ia Isaako?
Ua saunia e le Atua le mamoe e osi atu ai le taulaga ia te Ia.

Ia manuia Suega o lenei Aso Sa

ASO SA: MATI 01, 2026
MATAUPU: "Ua inosia Iosefa e ona uso"

TUSI FAITAU: Kenese 37: 5-11

TAULOTO: Eperu 3:14 Auā e mafuta fa'atasi i tatou ma Keriso, pe 'āfai tatou te tāofi mau i lo tatou ulua'i fa'atuatua e o'o lava i le gata'aga.

Sini: Ia malamalama tamaiti i le uiga ma le mafua'aga na inosia ai Iosefa e ona uso.

FESOASOANI MO LE FAIAOGA: Taea manuia ia outou Susuga i Faiaoga, malo lava le onosa'i ma le fa'atoatoa i feau ma galuega. O lea ua tatou la'a mai i le masina lona lua talu ona amatalia taualumaga fa'agasolo o lesona a nai fanau. Ia tautuana ma outou le fa'amamafa masani ina ia iloa ma malamalama tamaiti i le uiga pe a amata mea le Atua i so'o se fa'amoemoega e tapena ai i latou mo le lumanai. Manatu lea, ua na o se amataga e tatala ai lau sailiiliga mo le Tusi Faitau ua tu'uina atu mo le lesona, ae manatu ua lava tapena oulva mo le fa'amoemoe o lenei vaiseuga o tapenaga a nai Fanau. Ia manuia tapenaga uma mo le nei Aso Sa.

FESOASOANI MO LE MATAUPU: Sa i ai ia Iosefa se meaalofa mo le iloatino o fa'aaliga mai le Alii e ala i miti. O Iosefa ua lauiloa tele i le poto e fa'amatala miti. A o le mafua'aga lea na ala ai ona inosia Iosefa e ona uso, e le gata sa fai ana miti, ae sa toe nofo lava foi ia ma toe fa'amatala uiga o ana miti sa fai i ona uso ma lona tamā. Ioe, ua tupu tele le ita i uso o Iosefa, ma ua latou taupulepule ai e fa'ao'o le leaga ia Iosefa lo latou uso. O le tele lava o miti sa fai a Iosefa, o miti lava e fa'atatau ia te ia ma ona uso, fai mai o ona uso e latou te ifo uma mai ia te ia, ae e o'o lava foi i le la ma le masina o fetu e sefulu ma le tasi, e ifo uma atu ia te ia. O se fa'aaliga ua matua i ese lona fa'amatalaina, pe a tatou fua fa'ale-mafaufau iai. Auā o vaega uma ia ua ta'ua e Iosefa i ana miti, o vaega ia e tatau ma onomea i le Atua soifua. Ae peita'i, ua fa'aalia ai ia Iosefa le tele o meaalofa a le Alii i lona soifua ma lona ola. O meaalofa ia e le maua uma e i tatou, peita'i, o meaalofa ia na maua e Iosefa, o meaalofa o le iloatino o fa'aaliga mai le Alii e ala i ana miti sa fai. Le fanau e, o le mafua'aga lea na afua ai ona inosia Iosefa e ona uso, ona o uiga o ana miti sa fai, ma ua le mafai ai ona maua se filemu i loto ma mafaufau o ona uso.

Ae aua nei galo ia i tatou, o lo'o soifua le Atua, o ia e pule aoao i lo outou soifua ma lo tatou ola. Ia manuia tele outou le fanau. Amene.

FESILI:

- O le a le mafua'aga na inosia ai Iosefa e ona uso?
Ua fa'amatala e Iosefa uiga o ana miti sa fai i ona uso
- Aiseā na le onosa'i ai uso o Iosefa?
Ua tiga o latou loto, ona o uiga o miti sa fa'amatalaina e Iosefa.
- O a ni a'oa'oga taua ua tatou maua mai i le lesona sa fa'amatalaina?
(Tu'u le avanoa mo fa'asoa a fanau)

PESE: "Ua na'o oe o lo'u mana'o" - "You Are All I Need."

Ia manuia lenei Aso Sa



ASO SA: MATI 08, 2026
MATAUPU “Taupulepule e fasioti Iosefa”

TUSI FAITAU: Kenese 37: 12-24

TAULOTO: Eperu 3:14 Auā e mafuta fa’atasi i tatou ma Keriso, pe ‘āfai tatou te tāofi mau i lo tatou ulua’i fa’atuatua, e o’o lava i le gata’aga

Sini: Ia malamalama fanau i fa’amanuiaga o Iosefa na ala mai i le taupulepulega a ona uso e fasioti ia te ia.

FESOASOANI MO LE FAIAOGA: E le ititi le agaga fa’afetai i le Atua ona o le malosi fa’afouina ia outou Susuga i Faiaoga, tainane o le malosi lilo fa’aleagaga, e gafatia ai ona tatou taumafai e fa’amatala le Tusi Paia, e pei ona vala’auina ai lo outou soifua ma lo matou ola. E le suia lava le va’aiga masani, mo a tatou fa’atinoga amata ma le fa’agasologa mo le a’oa’oina o lesona mo fanau.. O le tauloto a nai fanau, o lo’o tauloto mai pea le tauloto o le Aso Sa ua tuana’i atu, ina ia mafai ai ona latou tauloto pea ni mau mai le Tusi Pa’ia, ina ia ‘aua nei toe galo. E taoto atu pea i la outou sailiga mo le tapenaga o lesona mo nai fanau, ae ua na o se amataga e tau fesoasoani atu ai i a outou tapenaga. Ia manuia le feagai ai ma lesona a fanau mo lenei Aso Sa. God Bless!

FESOASOANI MO LE MATAUPU: Pe a tatou va’ava’ai i manuia o Iosefa e pei ona fa’amauiina i lona olaga talavou, e peisea’i o le inosia ma le fa’atau ese e ona uso o Iosefa o se pologa, ua na o ni auala fa’a-le-tagata na faia peita’i, o lo’o o fa’atasi i ia faiga ma auala fa’a-le-Atua ina ia taunu’u atu ai i Aikupito i le nu’u e tino ai lona tulaga PULE i tagata e pei ona ia fa’amatalaina i ana miti.

O nisi ia o va’aiga na tutupu i le soifuaga o Iosefa e manatu ai tatou, o ni faiga fa’a-le-tagata peita’i, na o fa’atasi ma faiga fa’a-le-Atua e fa’ataunu’u ai fa’amanuiaga mo Iosefa. Manatua foi, o le fa’atonuga a lona tamā e alu e asi ona uso o lo’o leoleo i le vao. Peita’i, e fesiligia pea pe aiseā ua mafai ai e Iakopo ona tuli lona atalii e pele ia te ia e asi ona uso i le vao. A o lea ua iloa lelei e Iakopo, o Iosefa o se atali’i e inosia e ona uso, ona o lona alofa fa’asili ia te ia fa’atasi ai ma ana miti sa ia fa’amatalaina. E lē taumate o lo’o sa’ili’ili e le ‘au uso se auala e fa’ao’o ai se leaga ia Iosefa. Ioe, o Iosefa o le atalii e pele ia te ia, a’o lea ua tuli to’atasi i le vao. A’o le alu to’atasi i le vao e lē o se galuega faigofie. E tele manu fe’ai e ono lamatia ai le ola. I le ma le isi, e le o mautinoa po’o fea tonu e aga’i i ai Iosefa. Auā o le galuega fa’a-leoleo mamoe e lē tumau i se mea e tasi. E feoa’i solo i le vao e saili ni vao lelei mo manu. O fea lava e maua ai le vao lelei, o i’ina foi e malolo ai. O lona uiga, e le mautinoa le vave ma le tuai ona toe foi mai o Iosefa. A o Iosefa foi ua na o se tamaitiiti. E le tatau ona alu na o ia i le vao. Ae peita’i, o le itu taua lea o le tala, o le ola usiusita’i o Iosefa i le fa’atonuga. O le mea mautinoa, ua iloa e Iosefa le inosia o ia e ona uso, e le faigofie le alu to’atasi peita’i, na fa’alogo ma usita’i i le fa’atonuga a lona tamā. O le taupulepulega sa faia e le ‘au uso, ia fasioti Iosefa. Peita’i o Reupena na fautuaina le ‘au uso, e aua le fa’amaligiina le toto, ae tu’u ia te ia i se lua/pu i le vao ae aua ne’i o’o i ai se lima. Ioe, fanau ua tau lava le taupulepulega a uso o Iosefa e fa’ao’o le leaga ia Iosefa, ae fa’afetai i si ona uso o Reupena, lea ua


ia fai ma lavea'i mo lona uso laititi. Ae atonu o le finagalo foi lea o le Atua mo Iosefa. Ia manuia outou le fanau.. Amene.

FESILI:

- O le a le mea e tatau ona fai e le tagata fa'atuatua e pei o Iosefa?
Ia lototele ma usita'i 'aua le fefe.
- Aiseā na le musu ai Iosefa e nofo, ae ua alu lava e asi ona uso?
E taua ia Iosefa le fa'alogo ma usita'i i le fa'atonuga a lona tamā.
- O a le A'oa'oga mo tatou i lenei taeao ma le tala ia Iosefa?
Tatala le avanoa e fa'asoa ai nai fanau.

PESE: Fa'alogo ma Usita'i

Ia manuia lenei Aso Sa



ASO SA: MATI 15, 2026

MATAUPU: "Ua fa'asaoina/fa'aolaina Iosefa e le Atua"

TUSI FAITAU: Kenese 37: 25-28

TAULOTO: Eperu 3:14. Auā e mafuta fa'atasi i tatou ma Keriso, pe 'āfai tatou te tāofi mau i lo tatou ulua'i fa'atuatua e o'o lava i le gata'aga.

Sini: Ia malamalama fanau i ala o fa'amanuiaga a le Atua na ia fa'asaoina mai ai Iosefa mai ona uso.

FESOASOANI MO LE FAIAOGA: Fa'atalofa atu ia outou Susuga i faiaoga i lenei taeao fou. E iai lava le talitonuga, ua lava tapena a outou Susuga mo lesona a nai fanau, ae ua na o se amataga e tatala ai a outou sailiiliga ma tapenaga o Aso Sa ta'itasi. E taua le malamalama o nai fanau i fuafuaga a le Atua i lo outou soifua ma lo latou ola tuputupu a'e, ina ia iloa lelei fuafuaga alualu mamao a le Atua mo tatou uma. Peita'i, o a'oa'oga o le tala ia Iosefa e fa'asino i tagata ma lo latou soifua talitonu ma usita'i i le Atua, tusa lava po'o a faigata ma fitā e feagai ma i latou e le solomuli pe fa'avaivai ai. Ia ae manatua o le a taoto atu lava mo la outou tapenaga mo nai fanau i lenei Aso Sa. Ia manuia tele tapenaga uma. God Bless!.

FESOASOANI MO LE MATAUPU: O le taupulepulega sa faia e le 'au uso o Iosefa, ia fasioti ia Iosefa. O se tulaga le lelei i le silafaga a le Atua, peita'i, sa fa'aaogaina e le Atua Reupena, e ala mai ai lona alofa lavea'i mo Iosefa. Atonu o le ala lea na fautuaina ai e Reupena le 'au uso, ina ia aua le fa'amaligiina le toto o Iosefa, ae tu'u ia te ia i se lua i le vao ae aua ne'i o'o i ai se lima. O le fesili tele, o Reupena o le tasi o le 'au uso o lo'o 'ino'ino ia Iosefa. A'o lona suia o le taupulepulega na faia, o se auala lea na mafai ai ona fa'asaoina le ola o Iosefa mo le taunu'u atu i Aikupito. I le soifuaga lenei, e seāseā ona fa'aalia se manatu pei o Reupena. Se'i vagana le tagata ua i ai le Agaga o le Atua, e amata mea i auala e maua ai le filemu. O le fa'aaogaina o tagata fa'atau oloa i le ala. O le 'au fa'atau 'oa na latou fa'atauina atu Iosefa ia Potifara. E le o tele ni tala e uiga ia

Potifara. Peita'i o lo'o ta'ua lona loto fesoasoani ma le alofa ia Iosefa i se taimi vave e ui o ia o le Aikupito ao Iosefa o le pologa. O le alofa o Potifara ia Iosefa na fa'aeaina ai Iosefa e fai ma pule i lona aiga. O le alofa o le ta'ita'i i se pologa e le o se mea e maua gofie, se'ia vagana se ta'ita'i ua talitonu i le Atua.

O nisi ia o fa'atinoga fa'a-le-tagata e manatu ai tatou, na o fa'atasi ma faiga fa'a-le-Atua ina ia taunu'u manuia ai Iosefa, peita'i o le Atua ua fa'ailoa ia Iosefa e ala i le miti. Na lilo i manatu o Iakopo ma lana fanau e fa'aeaina Iosefa i ni fa'amanuiaga fa'apea. Ioe, e le taumasina le iloa o le tagata ma le finagalo o le Atua. O a fo'i faiga a le tagata e taumafai e 'ave'esea ai fa'amanuiaga a le Atua mo le tagata ua fa'amanuiaina, e lē mafai ona tino mai. Auā e fa'amaoni le Atua, e lē oge auala foi le Atua. E mafai foi e le Atua ona fa'aaoga o mea e fa'atauva'a i le tatou va'ai e ala mai ai ana fa'amanuiaga. O le fa'amalosi, ia fa'amaoni ma onosa'i i le soifua tautua o lo'o i ai. O a lava tiute ma faiva o galulue ai, ia tatou fa'amaoni, auā e auala 'ese'ese lava fa'amanuiaga a le Atua.

FESILI:

- Aiseā na fa'asoina ai Iosefa?
O le finagalo o le Atua, na ala atu ia Reupena lona uso.
- O le a se a'oa'oga sa e maua mai i le tala ia Iosefa i lenei taeao?
Tu'u le avanoa mo le faaso'a a fanau.

PESE: Ua ou filifili e mulimuli ia Iesu

Ia manuia lenei Aso Sa



ASO SA: MATI 22, 2026

MATAUPU: "O Iesu o le laveai sili o tagata uma"

TUSI FAITAU: Eperu 3:1-19

TAULOTO: Eperu 3:14. Auā e mafuta fa'atasi i tatou ma Keriso, pe 'āfai tatou te tāofi mau i lo tatou ulua'i fa'atuatua e o'o lava i le gata'aga.

Sini: Ia malamalama fanau o Iesu o le lavea'i sili o tagata uma lava.

FESOASOANI MO LE FAIAOGA: E le ititi le agaga fa'afetai i le Atua ona o lana tausiga alofa i lo outou soifua ma lo tatou ola, e fa'atalofa atu ai ia outou Susuga i faiaoga. Malo le soifua manuia, malo le onosa'i i tiute ma faiva ua vala'auina ai lo outou soifua. E iai le talitonuga, ua maua se malosia fou e fa'aauau ai o tatou faiva, mo nai fanau, ina ia tutupu ma soifua a'e i le Talalelei a Iesu Keriso. Ua manatu o le tala masani lea ua aumai e tatou te talanoa ai ma fanau, ina ia mausalī pea lo latou talitonuga, o Iesu o le lavea'i sili o tagata uma lava ina ua fa'atuatua ma talitonu fa'amaoni i le Atua, o a fa'afitauli ma fa'aosoosoga e fetiaia'i ma le tagata, tau lava ia tatou fa'atuatua ia te ia ma lona mana. Manatu ua na o se amataga foi e tau vavala ai la outou tapenaga, ae ua ia te outou lava le iloa e fa'afoe ai le fa'amoemoe mo lesona a fanau. Manuia foi ae tatou fa'aauau pea le

tauloto lena mo lenei masina, ae a outou manatu lava e sui, ia ona sui ane la'ia i se fuaiupu o le tatou Tusi Faitau e pei ona iai. Ia manuia tele tapenaga o lenei Aso Sa. God Bless!

FESOASOANI MO LE MATAUPU: O Iesu Keriso o le lavea'i sili o tagata uma. E tutusa lava o Ia ma le Atua lo tatou Tamā oi le lagi. E sili atu o Ia nai lo o agelu ma perofeta uma o e na muamua mai ia te Ia, e aofia ai ma Mose. O Isaraelu anamua sa aumaia ma fa'asaoina mai i fafo mai o Aikupito. Manatua foi sa nofo pologa Isaraelu ia Aikupito. Peita'i, sa le'i mafai ona ulu atu i le filemu o le Alii ona sa fa'ama'a'a o latou loto e fa'asaga ia Iesu Keriso ma lana auuauna o Mose. I le avea ai ma faitaulaga sili maoa'e, ua silisili lava Iesu i faitaulaga sili uma a Mose. E ala i lona puapuagatia, na fa'aatoatoaina ia Keriso. E mafai ona tatou ulu atu i le filemu ma manuia o le Alii ma "fa'ao'o atu i le fa'aatoatoaga" e ala i lo tatou a'oa'oina o ala o Iesu e uiga i le talalelei. Ua a'oa'o mai le Eperu, o Iesu Keriso e sili atu nai lo o le tulafono aua o Ia na tu'uina maia le tulafono ia Mose. Ua a'oa'o mai foi le Eperu, e maua e perofeta le mana e ala i le fa'atuatua ia te Ia, o Ia o le Faitaulaga Sili Maoa'e lea na Ia fa'ataunu'uina le taulaga i taimi o le Feagaiga Tuai, o Ia e sili atu nai lo o agelu. Na ia saunia le taulaga toggiola, e mafai ai ona tatou maua le fa'amagaloga o agasala. Aua o Iesu Keriso o ia o le lavea'i silisili, e ala i le taulaga o le fa'aolataga mo tatou ma le lalolagi atoa. O Iesu Keriso lava ia, o le Alo o le Atua Silisiliese, na ia Afio mai, e lavea'i ma fa'aola le lalolagi agasala, e ala i lona maliu ma lona toe soifua manumalo mai i le oti ma le tu'ugamau. O ia lava o le faitaulaga silisili na ia lavea'i i tatou ma tagata uma, ona o lona lea alofa tunoa e fa'avavau. Ia manuia tele outou le fanau.. Amene.

FESILI:

- Aiseā e sili ai Iesu ia Mose ma isi perofeta?
O Iesu Keriso e leai se isi e tutusa ma ia, o lona alofa na ia osi ai le taulaga o le Fa'aolataga.
- O ai na fa'aolaina ma lavea'iina i le taulaga sa faia e Iesu Keriso?
O tatou uma ma le lalolagi atoa.
- O le a se a'oa'oga sa e maua mai i le tala sa fa'amatalaina?
Tu'u le avanoa mo le faaso'a a fanau.

PESE: E lelei le Atua.

Ia manuia le Aso Sa



ASO SA: MATI 29, 2026
MATAUPU: "O le taulaga e tasi mo tagata uma" (LAUPAMA)
TUSI FAITAU: Eperu 10: 1-18

FESOASOANI MO LE FAIA'OGA: E ofo alofa ma fa'atalofa atu ia outou Susuga i Faiaoga i lenei taeao fou. Manatu ua maua se fa'asiliga-malosi mai feau ma galuega o lena vaiaso ua mou atu. Ae ua manatu le Ofisa, ua au-tausagā foi ona tatou fa'amatala tala o le Aso Sa o le Laupama, e le mafai lava ona toe suia ai. O le mea lea,

e lelei ona taoto atu ia outou Susuga se tapenaga mo le tatou Aso Sa o le Laupama ina ia faigofie ai i nai fanau o loo outou mafuta se fa'atinoga faigofie mo latou. E leai se manatu o le a le fa'amatalaina ai le tala masani, ae lelei ona fa'amamafa sina fa'atinoga e taofi gofie ai e fanau lea tala. E sui lava faiga ae tumau lava le tala o le malaga fa'atupu a Iesu. E manaia foi ae fai ane sina ata faigofie, ma sina polokalama masani mo nai fanau, aua le fa'atauaina o lenei Aso Sa o le malaga fa'atupu a lo tatou Alii Fa'aola o Iesu Keriso. Ia manuia le tapenaga mo le malaga fa'atupu a Iesu Keriso aga'i atu i Ierusalem. God Bless!

FESOASOANI MO LE MATAUPU:

OSANA I MEA AUPITO ALUGA! IA MANUIA LE AFIO MAI I LE SUAFA O LE ALII



PESE: Osana pepese tamaiti uma

Ia manuia le Aso Sa o le Laupama



ASO SA: APERILA 05, 2026

MATAUPU: “TAPENA ANE SE FA’ATINOGA MO LE TOETU” (ASO SA ESETA)

Sini: Ia malamalama fanau i le taua o le Aso Sa o le Toetu ma le tu’ugamau tu’ufua.

FESOASOANI MO LE FAIA’OGA: O le vi’iga i le Atua ma le agaga fa’afetai e le fa’aitiita ia outou Susuga i faiaoga, ona o lo outou loto i le galuega ma le lava onosa’i i su’esu’ega ma tapenaga o lesona a fanau. Manatu ua maua se fa’asiliga malosi o le tino, mafaufau ma le agaga, auā tiute ma faiva ua vala’auina ai lo outou soifua

ma lo tatou ola. Ae manatu o lea ua tatou iai i le vaiaso sa o le Toetu /Aso Sa o le Eseta, o le ala foi lea ua taoto atu ai lava ia outou Susuga i Faiaoga, se polokalama faigofie mo lenei Aso Sa ina ia o fa'atasi ma tapenaga o le Aso Sa o le Eseta mo nai fanau. O si ata o le tu'ugamau tu'ufua lena, e fa'afaigofie ai mo a outou tapenaga. aE lelei ona faamatala ma faatino lea vaaiga e tusa ma le molimau a se fai evagalia e filifili ane faamolemole. Poo le a lava le fa'atinoga, fa'asamoa po'o se isi foi atunu'u, a ia maua le feau ua mautinoa e fanau ua avanoa le tu'ugamau ua toetu Iesu mai le oti. O lo tatou fa'atuatuga lea, o le Atua toetu ma toe soifua manumalo, e le o toe i ai i le tuugamau. Ia manuia tapenaga uma o le Eseta. God Bless!

FESOASOANI MO LE MATAUPU:

UA TOETU IESU/JESUS IS RISEN



PESE: Alive, Alive, Alive Forevermore. My Jesus is alive, alive forevermore

Ia manuia le Aso Sa o le Eseta

ASO SA: APERILA 12, 2026

MATAUPU: “O le poloaiga a Iesu Toetu”

TUSI FAITAU: Mataio 28: 11-20

TAULOTO: Mataio 28: 19. “O lenei, ia outou o atu e fai nu’u uma lava ma so’o, ma papatiso atu ia te i latou i le suafa o le Tamā, ma le Atalii, ma le Agaga Paia.”

Sini: Ia malamalama fanau i le mafua’aga na Afio mai ai Iesu i le lalolagi nei, aemaise o lana poloa’iga.

FESOASOANI MO LE FAIA’OGA: Malo le soifua manuia ma le galulue ia outou Susuga i Faaoga i lenei taeao fou i le alofa ma le agalelei o le Atua. Manatu ua tuana’i atu le Aso Sa ua mavae atu, sa outou feagai ai ma se polokalame matagofie, sa outou fa’atinoina mo nai fanau, auā le fa’amanatuina o le Aso Sa o le Laupama, ae tainane le Aso Sa o le Eseta. Ia viia le Atua, fa’afetai le galulue. Ia, ua toe fa’auau foi la tatou pitola’au masani mo a tatou lesona. O le tala masani lava ina ua tuana’i le maliu o Iesu, ae le’i Afio i le lagi, o lana poloa’iga lea ma lana fa’amalosi’au i lona ‘au so’o, ina ia loto tetele mo le galuega tala’i. Ua manatu lava, ua na o se amataga foi, ae taoto atu ia outou Susuga mo le fa’alateleina o la tatou lesona mo lenei Aso Sa. Ia manuia tele tapenaga uma. God Bless!

FESOASOANI MO LE MATAUPU: O le tatou tala i lenei taeao, o le poloa’iga a Iesu, manatua foi o lea ua toe soifua manumalo mai Iesu mai le oti ma le tu’ugamau. A o le’i Afio a’e Iesu i le lagi, o le mafua’aga lea o lona Afio mai i le lalolagi, na afio mai lava o ia o se auaua. Na mafuta fa’atasi ma le tagata agasala, na tusitusi lima i ai tagata. E o’o lava i ta’ita’i o lotu, o latou lava sa taulamua e saili se auala e fasioti ai Iesu. O faigata ia na feagai ma Iesu ae le i fa’avaivai sa fa’amalosi pea ina ia fa’aolaina le lalolagi. Na sasa ma fa’atigaina, na inosia ma ‘amusia, na o’o i le satauro ma le tu’ugamau. Peita’i, na manumalo a’ia’i ai Iesu Keriso e ala i lona toe soifua manumalo. A’o le’i Afio Iesu i le lagi, o lea ua toe fa’atasi ma lona ‘au so’o. Ua silafia lelei e Iesu e le faigofie le tu’ua ai o le mafutaga ma ona so’o. Auā o lea lava e fa’atupulaia sauaga, e mautinoa fo’i e fusia le ‘au so’o i le fa’avaivai. Peita’i, o lea ua fetalai fa’amafanafana Iesu, e na te le tu’ulafoaina i latou e o’o lava i le gata’aga o le lalolagi. O le finagalo o Iesu, ina ia fa’alototele ma fa’amalosi’au i le ‘au so’o, mo le galuega e ala i le tala’i atu o le Talalelei, ina ia so’o ai le lalolagi uma. O lo’o fetalai manino le Alii o Iesu, ua tu’uina atu ia te Ia le pule uma lava i le lagi ma le lalolagi. O lona uiga, ua ia Iesu Keriso le pule aoao, ma e leai se mea e toe popole ai le tagata, tau lava ina fa’atuatua ma talitonu ia Iesu Keriso. **O lona mana’o lea, ina ia o atu ma ia fai nu’u uma lava ma so’o ma ia papatiso atu i le suafa o le Tamā, o le Atalii ma le Agaga Paia, ma ia a’oa’o atu ia te’i latou ia tausii i mea uma, ua ou fai atu ai ia te outou.** O le poloa’iga sili lea a Iesu, i lona fa’amoemoe ia fa’auau pea le talalelei ina ia maua e tagata uma o le lalolagi le ola e fa’avavau ua ma’ea ona ia saunia. O le poloa’iga a Iesu mo lona ‘au so’o, o le poloa’iga lava foi lea mo tatou uma le fanau, a tamaiti. Ioe,

o lou sau i le Aoga Aso Sa i Aso Sa uma, o le fa'amoemoe ia a'oa'oina i tatou i le finagalo o le Atua ina ia mafai fo'i ona tatou o atu ma tala'i atu, le talalelei ia Iesu i isi fo'i a tatou uo. Ioe fanau, 'aua nei galo le poloa'iga a Iesu ma lana fetalaiga i lona 'au so'o "**O lenei, ia o outou o atu e fai nu'u uma lava ma so'o, ma ia papatiso atu ia te i latou i le suafa o le Tamā, ma le Atalii, ma le Agaga Paia;**" ia fai lona ma fa'amalosi'au mo tatou le fanau, ina ia mafai ai pea ona tatou o mai ma fa'alogo pea i ana Afioga Pa'ia, e mafai ai ona a'oa'oina i tatou uma i ala o Iesu lo tatou Alii Fa'aola. Ia manuia tele outou le fanau.. Amene.

GALUEGA FA'ATINO:

- **O le a se vaega taua na Afio mai ai Iesu i le lalolagi?**
O le Afio mai o Iesu, o ia o le auauna, ina ia fa'aolaina le lalolagi ia te Ia.
- **O le a le poloa'iga a Iesu i lona ausoo?**
Ia o outou o atu e fai nu'u uma lava ma so'o, ma ia papatiso atu ia te i latou i le suafa o le Tamā, ma le Atalii, ma le Agaga Paia
- **O le a se a'oa'oga taua sa e maua mai i le tala sa faamatalaina?**
Tu'u le avanoa mo le faasoa a fanau

PESE: 144 (Ua soona olioli nei.)

Ia manuia le nei Aso Sa



ASO SA: **APERILA 19, 2026**

MATAUPU: **"Ua a'oa'o mai Iesu i le Tatalo"**

TUSI FAITAU: **Luka 11: 1-13**

TAULOTO: **Mataio 28: 19.** "O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tamā, ma le Atalii, ma le Agaga Paia.

Sini: Ia malamalama fanau i le taua ma le mafua'aga o le tatalo ma fa'atauanau pea i le Atua.

FESOASOANI MO LE FAIA'OGA: E fa'atalofa atu ia outou Susuga i Faiaoga, malo le soifua manuia ma le tauata'i i feau ma galuega o lona vaiaso ua mou atu. E iai le talitonuga ua mafa totoga la outou tapenaga mo le Aso Sa, aemaise o la tatou lesona fa'atulagaina mo lenei taeao; **Ua a'oa'o mai Iesu i le Tatalo.** Manaia foi, ae fai fa'atasi e le fanau le tatalo a le Alii, e amata ai le lesona, ina ia o fa'atasi ma le fa'amatalaina o le mataupu ma le tusi faitau mai le Tusi Paia o lenei Aso Sa. E taoto atu foi i la outou sailiga, se atoaga mo le lesona ua fa'atulagaina atu mo a tatou tapenaga, ae ua na o se amataga e tata'i iai la outou folasaga mo nai fanau. Ia manuia tele tapenaga uma mo le lesona o lenei Aso Sa. God Bless!

FESOASOANI MO LE MATAUPU: O le tatalo a le Alii fanau, o se 'au'upega sili lea sa folafola mai e Iesu mo i tatou pe a o'ina o tatou vaivai, ma afatia i tatou i fita ma fa'afitauli o le ola. Ae na pau foi lea o le auala sa fa'a'ailoa mai e Iesu, e mafai ai ona o tatou tu'uina atu o tatou mana'oga ma mea uma tatou te manana'o ai i lo tatou Atua e to'atasi. Auā e tali mai lava o Ia, pe a tatou ole atu ma tatalo atu pea e le aunoa. O le ala foi lea sa ia aumai ai se fa'ata'ita'iga mai le tala sa tatou faitauina mai le tusi faitau o lenei taeao. Ua fetalai atu Iesu iā i latou: "Sa fa'apea ua alu atu se tasi i sana uō i le vaeluapō ma fa'apea atu, 'La'u uō e, se'i aumai iā te a'u ni falaoa se tolu, auā fa'ato'ā taunu'u mai le malaga a se tasi o a'u uō, ma e leai se mea ou te laulauina atu mo ia.'" Ae tali mai lenā uō mai totonu o le fale: 'Soia le fa'alavelave mai iā te a'u. Ua loka le faitoto'a, ua matou momoe ma la'u fanau. E lē mafai ona ou toe tū atu e avatu se mea iā te oe.' Ou te fai atu iā te outou, e ui lava o ia o lau uō, ae e lē tū mai o ia e aumai se mea. Ae ona o lou fa'atauana atu pea, o le a tula'i ai loa o ia ma aumai iā te oe mea e te mana'omia. O lea, ou te fai atu ai iā te outou, ia talosaga atu pea, ona foa'iina mai lea iā te outou. Ia sa'ili atu pea, ona outou maua ai lea. Ia tu'itu'i atu pea, ona tatalaina mai lea iā te outou. Auā o ē uma e talosaga atu, e foa'iina mai iā i latou. O ē uma e sa'ili atu, e maua e i latou. O ē uma e tu'itu'i atu, e tatalaina mai iā i latou. O lea, o ai se tamā o iā te outou e ole mai lona atalii mo se i'a, ae ia avatu i ai se gata ae e lē o se i'a? Pe e ole mai fo'i mo se fuāmoa, ae e avatu i ai se akarava? O lea, pe afai o outou o tagata leaga, ae e tou te iloa avatu meaalofa lelei i a outou fanau, e sili atu la ona foa'i mai e le Tamā o i le lagi le agaga pa'ia iā i latou o ē e ole atu iā te ia!" Ioe, fanau, e matagofie le tala lea ua outou fa'alogi iai, e matala mea uma i le Atua, pe afai o tatou o tamaiti e tatalo ma tatalo pea e le aunoa. 'Aua nei galo so'o se taimi lava o le Aso ia tatou tatalo ma tu'u atu i le Atua o tatou mana'oga, ona tali mai ai lea o Ia e le aunoa ia i tatou. Ia manuia tele outou le fanau.. Amene.

GALUEGA FAATINO: Fa'ata'ita'i ona tatalo tamaiti (tu'u i le Atua se mana'oga o o mai ma latou)

PESE: Come into my heart Lord Jesus
Come into my heart, O Lord Jesus,
Come into my heart, I pray;
My soul is so troubled and weary,
Come into my heart, today.

Into my heart, into my heart,
Come into my heart, Lord Jesus;
Come in today, come in to stay,
Come into my heart, Lord Jesus.

Ia manuia le Aso Sa



ASO SA:

APERILA 26, 2026

MATAUPU FAAMANATU: “MATAUPU O APERILA”

FESOASOANI MO LE FAIA’OGA: E ofo alofa ma fa atalofa atu ia outou Susuga i Faiaoga i lenei vaiaso o le tapenaga mo su’ega o lenei Masina. E iai le talitonuga ua maua se malosi fa’asili mai feau ma galuega o lo’o outou feagai ai. Peita’i, e manatu o lea ua tatou o’o mai i le fa’ai’uga o lenei masina, o lea ua tu’uina atu ai ia outou Susuga tapenaga mo ni fesili, e fua lava ia outou tapenaga sa feagai ai ma lesona a nai fanau mai le amataga o lenei Masina. Ae ua na o se toe fa’amanatu o fesili sa talanoa atu ai i taimi o a tatou mataupu sa feagai ai. Ia manuia tele le feagai ai ma tapenaga uma o lenei Aso Sa. God Bless!

FESILI:

- 1. O le a le mea e tatau ona fai e le tagata fa’atuatua e pei o Iosefa?**
Ia lototele ma usita’i ‘aua le fefe.
- 2. Aiseā na le musu ai Iosefa e nofo, ae ua alu lava e asi ona uso?**
E taua ia Iosefa le fa’alogo ma usita’i i le fa’atonuga a lona Tamā.
- 3. O le a se fuafuaga a le Atua mo Iosefa?**
O le a auala mai ai le fa’aolataga mo lona aiga.
- 4. O le a le mafua’aga na inosia ai Iosefa e ona uso?**
Ua fa’amatala e Iosefa uiga o ana miti sa fai i ona uso
- 5. Aiseā na le onosa’i ai uso o Iosefa?**
Ua tiga o latou loto, ona o uiga o miti sa fa’amatalaina e Iosefa.
- 6. O le a se vaega taua na Afio mai ai Iesu i le lalolagi?**
O le Afio mai o Iesu, o ia o le auauna, ina ia fa’aolaina le lalolagi ia te Ia.
- 7. O le a le poloaiga a Iesu i lona ausoo?**
Ia o outou o atu e fai nu’u uma lava ma so’o, ma ia papatiso atu ia te i latou i le suafa o le Tamā, ma le Atalii, ma le Agaga Paia
- 8. O le a le taua o le tatalo ma fa’atauanau i le Atua?**
E leai se isi auala tatou te tu’uina atu ai o tatou mana’oga i le Atua, ua na o le tatalo.

PESE: Fa’alogo ma Usita’i.

Ia manuia Suega o lenei Aso Sa



ASO SA:

ME 03, 2026

MATAUPU: “O le fa’amalologa i Petesa”

TUSI FAITAU: Ioane 5: 1-18

TAULOTO: Luka 18:1 ‘Ua ta’u atu e Iesu lenei tala fa’atusa e a’oa’o atu ai ‘iā te i latou, ‘ina ‘ia tatalo pea

lava pea, ae ‘aua le fa’avaivai.

Sini: Ia malamalama fanau e taua lo latou talitonu i le Alii Fa’aola, aua o ia e ana le fa’amalologa.

FESOASOANI MO LE FAIAOGA: Malo le soifua manuia, malo le fa’atoatoa i feau ma galuega ua vala’auina ai lo outou soifua. O lea ua tatou o’o mai i le masina lona lima lenei, o lenei tausaga 2026. E fa’afetai ai i le Atua, ona o lona fa’aaogaina pea o lo outou soifua e fai ma avefeau o lana Talalelei mo fanau a le atunu’u ma le Ekalesia. E manaia foi ae tofi se tamaitiiti e sauni mo le tatalo amata i lenei Aso Sa, e toe fa’amanatu ai le taua o le lesona o le Aso Sa ua tuana’i atu. Ia iloa e tamaiti e tāua le tatalo amata e amata ai so’o se fa’amoemoe, aemaise foi o a latou tapenaga mo le Aoga. E ta’u atu ai foi o le a amata le lesona. Ae a fai loa le tatalo, ua tatau ona fa’alogo ma ua’i uma mai le fa’alogo i le lesona o le a fai. O le vala’aulia lea o le Agaga Paia e afio mai e pulea le taimi atoa. Tatalo mo le faia’oga ma le lesona. Talosia tamaiti e le’i o’o mai, nisi o mama’i, ma ē ua o’o mai ina ia aogā le lesona mo tagata uma, ma ia iloa e fanau, o lālā i latou o le Taelega i Petesa e o’o atu ai le fa’amalologa a le Atua i e o mama’i ma mafatia i so’o se avega. Ia manuia le tapenaga mo le lesona. God Bless!

FESOASOANI MO LE MATAUPU: Ua fa’amalolo e le Fa’aola se tagata pipili i le taelega i Petesa ma folafola atu ai lona mana pa’ia ma le pule aoao. Ua Ia fafagaina le silia ma le 5,000 o tagata e sauniuni ai mo lana lauga i le Areto o le Ola, folafola atu o Ia o le Mesia, ma ta’utino atu i le Talisuaga o Fale Apitaga e na o i latou lava e talia o Ia e mafai ona maua le ola e fa’avavau. Ina ua uma ona auauna atu Iesu Keriso i Kalilaia, sa malaga atu o Ia i Ierusalemia i le fa’amanatuina o le tausamaaga a Iutaia, pei o le Paseka. A o i ai i Ierusalemia, sa maliu atu o Ia i se taelega e lata ane i le malumalu o le taelega lea e ta’ua o le taelega i Petesa o lo’o gasolo iai tagata o lo’o **mama’i, tauaso, pipili, ma ma’i tino vale** ua fa’amatala mai ai o tagata o e mama’i, vaivai, po o e i ai ni mana’oga fa’apitoa. O le mea sa fa’atalitali i ai nei tagata mafatia, atonu sa i ai se vaipuna e masani ona tafe atu i nisi taimi i le taelega ma afua ai ona ga’epu le vai lea, atonu e maua ai se to’omaga o nei tagata mama’i. E leitioa le taelega i Petesa o se vaipuna o minerale o lo’o i ai i lona vai se vaifofo fa’amalolo, ina ia fa’amalolo ai tagata e ulu ifo i ai. O vavega fa’amalolo e leai lava se isi auala e aumaia ai i le taelega, ma le anoanoa’i o tagata e fa’amoemoe e fa’amalolo ai. O **Petesa** o lona uiga o le **“fale o le alofa mutimutivale”** o le alofa mutimutivale o le aga alofa po o le agalelei. O le fa’atinoga aupito sili o le alofa mutimutivale sa faia o le Togiola lea a Iesu Keriso. Ma e talafeagai ai le igoa **Petesa** mo lenei nofoaga, aemaise ina ua uma ona fa’amalolo e le Fa’aola lenei tagata ma’i, ae ia mautinoa e fa’amamafa mai fa’apea, **o le mana ma le alofa mutimutivale o Iesu Keriso, e mafai ai ona tatou malolo.** E pei lava ona mana’omia e le tagata pipili i le Taelega i Petesa se tasi e malosia atu nai lo ia e fa’amaloloina ai, e fa’apena ona tatou fa’alagolago i vavega o le togiola a Keriso pe afai e fia fa’amaloloina o tatou agaga mai le tiga, fa’anoanoa, ma le agasala. O Keriso lava e toe fa’aleleia ai loto ua nutimomoia ma le filemu e suia ai le atuatuvaile ma le faa’noanoa. Ioe fanau, e taua tele

lo tatou talitonu ma le fa'atuatua, o Keriso lava o ia o le punāvai o le Taelega i Petesa, e malolo ai uma o tatou mafatiaga uma. Ia manuia tele outou le fanau.. Amene.

GALUEGA FA'ATINO: FESILI ma TALI

- Aiseā na manao ai Iesu e asiasi ane i le taelega i Petesa?
Ua silafia e Iesu, o lo'o iai tagata o lo'o moomia lana fa'amalologa.
- O le a le uiga o le Taelega i Petesa?
O le Fale o le alofa mutimutivale..
- O le a se a'oa'oga taua sa maua mai le tala sa faamatalaina?
(tu'u le avanoa e faasoa ai fanau)

PESE: Ana iai se taelega pei o lea nai i Petesa (Punialava'a) po'o le (Pacific Soul)

Ia manuia lenei Aso Sa



ASO SA: ME 10, 2026

MATAUPU: “E tupu vavega i le Fa’atuatua o Tinā” (ASO SA O TINĀ)

TUSI FAITAU: Mareko 7: 24-30

TAULOTO: Luka 18:1 ‘Ua ta’u atu e Iesu lenei tala fa’atusa e a’oa’o atu ai ‘iā te i latou, ‘ina ‘ia tatalo pea

lava pea, ‘ae ‘aua le fa’avaivai.

Sini: Ia malamalama fanau e tutupu vavega i le fa’atuatua ma talitonu i le Atua.

FESOASOANI MO LE FAIAOGA: Fa’atalofa ma fa’afeiloai atu ia outou Susuga i Faiaoga, malo le fa’amalolosi mo le Atua ma lana galuega. Ia malo lava le soifua manuia, fa’afetai le onosa’i mo la tatou pito la’au tau’ave i nai fanau ia soifua ma ola i le Talalelei a Iesu Keriso. Manatu e taua tele le Aso Sa lenei mo nai tinā, le ala lea ua manatu ai e fa’atino ane e a outou Susuga se faiga faigofie e amata ai le lesona o lenei Aso Sa. Ae ia tulituli pea le taua o le lesona o lenei taeao; E tutupu vavega i le fa’atuatua o tinā. Manatua o le Aso Sa lenei o le Aso Sa o tinā. Ua na o se amataga foi e tatala ai la outou tapenaga, ae fai lava e outou se faiga faigofie mo a tatou lesona. Ia manuia le tapenaga, manuia le Aso Sa o Tina. God Bless!

FESOASOANI MO LE MATAUPU: Ua iloga Aiga Samoa ma le tagata e ona le matāfaioi o le tausi o le aiga ia mautū lona tamāoaiga. Ia mautinoa ua iai mea’ai a lona aiga i aso ta’itasi, e iai fo’i le tagata e tausia, fa’amamā. fafaga ma a’oa’o le fanau. Peita’i, o le ituaiga a’oa’oga ma le tausiga lenā, e na o le tinā lava e mafai ona ia fa’atino vavega uma ia mo le Aiga. O le tatou lesona i le asō, o lea ua tatou faitau ma fa’alogologo i se ituaiga tinā, sa tutupu ai vavega ona o lona fa’atuatua e le’i solomuli, o lona naunau ua ia maua lona Alii

Fa'aola, e fa'amaloloina le gasegase o lana tama teine sa ulutinoina e le agaga leaga. Fai mai le tala ua alu ese o ia, ae aga'i atu i le vaipanoa o Turo ma Saitonu. Ona ulufale atu lea o ia i se fale, ma e le'i mana'o e iloa mai o ia e se tasi. Peita'i, e le'i lilo o ia i le va'aiga a tagata. Ina ua fa'alogo loa le fafine o lo'o ma'i lana tama teine i le agaga leaga e uiga ia te ia, ona sau loa lea o ia ma fa'apa'u fa'o i ona vae. O le Eleni le fafine, ae e nofo i Suria Foinie; ma ua 'ai'oi mai pea o ia ia Iesu ina ia tuliese le temoni mai lana tama teine. Ae na fa'ate'ia ina ua ia fetalai atu Iesu ia te ia: "Se'i ma'o'ona muamua tamaiti, auā e lē tatau ona lafo falaoa a tamaiti i tama'i ta'ifau." Peita'i, ua tali mai le fafine ia te ia: "E sa'o lava oe, a o le mea moni, e 'ai e tama'i ta'ifau o lo'o i lalo o le laulau fasi falaoa a tamaiti." Ua va'ai la tatou iai, o se tinā finau tele lenei tinā, e le'i popole i lona tulaga o ia o le tagata o nu'u ese, ae na pau lona talitonuga, o le fa'aolataga lea ua ia fa'alogo iai e le tatau ona ia toe misia. O le mafua'aga lea o le fetalaiga a Iesu, lea, ua ia fetalai atu ai ia te ia: "Ona o le upu ua e fai mai ai, inā alu ia, ua alu ese le temoni mai i lau tama teine." Ioe fanau, ua tatou va'ai la i le fa'atuatua o lenei tinā, lea ua tupu le vavega ua fa'amalolo e Iesu lana tama teine, o se va'aiga uiga ese ma le mata'utia ina ua fetalai atu i ai Iesu ia te ia. Ona alu ai lea o ia i lona aiga, ma ia iloa atu ai le teineitiiti o lo'o taoto mai i lona moega, ua alu ese le agaga leaga sa ia te ia. Ioe, ua le fou lenei tala i la outou fa'alogo ma le vavega sa faia e Iesu i le tama teine a lenei tinā ma lona naunauta'i ia fa'amaloloina lana tama ma ia fa'atumuina i le olioli ma le fiafia mai ia Iesu. Ua avea lenei tala o se fa'aa'oa'oga lelei mo tatou i lenei Aso Sa taua e fa'asino i o tatou tinā ma o latou tiute fa'atinā, o lo'o latou saili le ola, ina ia maua pea le ola maloloina ma le malosia e i tatou le fanau. Fanau, e iloa gofie lava le tinā e mata'u fa'atuatua ma talitonu i le Atua, e le mafai ona ia taofia se mea ua ia iloa e lelei mo lana fanau, ina ia maua uma e i latou le fa'amalologa sili mai ia Iesu, aemaise ona manuia e fa'avavau. Ia manuia tele outou le fanau. Manuia le Aso Sa o Tinā.. Amene.

GALUEGA FAATINO: (FESILI ma TALI)

- E fa'afefea ona e fa'amatalaina le tinā lea e ta'ua i le lesona?
O le tinā e finau, ma le fa'atuatua ma talitonu i lona Alii
- O le a se naunautaiga sa i lenei tinā mo lana tama teine?
Ia fa'amaloloina e Iesu ma ia tuli ese le agaga leaga sa nofo ai.
- O le a se a'oa'oga taua sa e maua mai i lenei tala, aemaise o le nei Aso Sa o tinā?
(Fa'asoa fa'atasi ma nai fanau)

PESE: "Lo'u tinā, lo'u tinā; e pele pea oe i le agaga".

Ia Manuia le Aso Sa o Tina 2026



ASO SA: ME 17, 2026
MATAUPU: "O le fa'asoēsā aoga a le Tina"

TUSI FAITAU: **Luka 18: 1-14**

TAULOTO: **Luka 18:1** ‘Ua ta‘u atu e Iesu lenei tala fa‘atusa e a‘oa‘o atu ai ‘iā te i latou, ‘ina ‘ia tatalo pea

lava pea, ‘ae ‘aua le fa‘avaivai.

Sini: Ia malamalama fanau, e aoga le fa‘asoesā a le tinā, na talia ai lona mana’o.

FESOASOANI MO LE FAIAOGA: E fa‘atalofa atu ia outou Susuga i Faiaoga. Malo le lagi e mamā ma le soifua manuia i le alofa tausī o le Atua. Manatu ua maua se malosī fa‘asili auā a tatou tapenaga mo lesona a nai fanau i lenei Aso Sa, ae ua na o se amataga foi e tatala ai a outou tapenaga. E iai le manatu e fa‘aogaina le tauloto o le mataupu ua tuana’i atu, e tauloto pea e fanau, ae a outou lē finagalo iai, ia ona fai ane lea o se isi fuaiupu o le tatou Tusi Faitau o lenei Aso Sa. Lelei foi ae tofi se tamaititi e faia le tatalo amata, ia fa‘amasani ai pea nai fanau ia iloa ona soifua tatalo i so’o se taimi. O nai taumafaiga na ina ia o fa‘atasi lo tatou naunau atu i a‘oa’oga ma le tapenaga o nai fanau mo le Talalelei a Iesu Keriso. Ae manatu lava, e le fāoa i se fa‘atauva’a o le Ofisa, so outou finagalo tapena, mo nai fanau o lo’o outou mafuta i aso uma ma Aso Sa ta’itasi o la outou galuega fa‘atino. Ia manuia tele tapenaga uma. God Bless!

FESOASOANI MO LE MATAUPU: I le Luka 18:1-14 e aofia ai ni vaega ‘autu se lua: o le tatalo e le fiu e fa‘alagolago i le lotomalie ma le fa‘amaoni, fa‘apea foi ma le fa‘atauanauina o loto i le o gatasi ma le fa‘atauanau i le finagalo o le Atua. I le vaega muamua (1-8), o lo’o fa‘amamafaina ai le taua o le onosa’i ma le tutumau i le tatalo, ma ia iloa ai ma le mautinoa o le Atua e ana le mana e fa‘afofogaina ai a tatou talosaga ma ia taliaina. I le vaega lona lua (9-14), o le fa‘aogaina lea o le fa‘atauanau i le Atua ma tagata lautele, ua fa‘amanino ai le vaega ua fa‘atatauina i le Atua e fai ma talosaga i se tatalo e fa‘aalua ai lona viiga. O lenei talosaga e fa‘aalua ai le mafai ona o le Atua, ma lona alofa tele, ua ia silasila ai i le tagata, ma ua fa‘apea foi ona ia finagalo i le usita’ia o le fa‘amalamalamaga ma le galuega a le Atua i le agaga o tagata. I le tatalo, o le fa‘amaoniga lea, o se fa‘atauanau e pei o se talosaga, e tau le iloa ai le fa‘amaoni ma le agalelei i le tagata ia fa‘aalua le finagalo o le Atua i lana galuega. Ma ua fa‘aalua ai le alofa tele o le Atua, ona o lona finagalo i le lagona o le tagata, e tatau ona fai ma fa‘avae mo tatou uma, fa‘apea foi le fa‘amaoni ma le alofa, o fa‘avae uma o le ola i le Atua. O le ala lea na mafua ai ona le mafai ona toe nofo le fa‘amasino amioletonu, ae ua tula’i ma tali atu i le fa‘asoesā so’o ane o lenei fafine ia te ia. Fa‘auta la tatou le fanau, o le aoga lea o le alu ane so’o o lenei fafine ua oti lana tane, i le fa‘amasino amioletonu, ina ia faia e ia le fa‘amasinoga o le tagata ua iai ana meatotino. O le upu **fa‘asoesā** lea e fa‘aoga mai i le tusi faitau, ma le ‘autu o le tatou lesona, o le tagata e le malolo e alu ane so’o ma fa‘alavelave ane e tauanau se isi i se mea e mana’o iai, se’i loga lava ua matala atu fa‘atoa uma foi lea o le alu ane so’o iai. A o le ata lena o le tagata e tatalo ma fa‘atauanau i le Atua i sona mana’oga e mana’o iai, o le upu moni fanau, e tali mai lava le Atua ia tatou tatalo, ma mea uma tatou te manana’o iai, e pei foi o lenei tinā, ma lona fa‘atauanau atu i le fa‘amasino amioletonu, lea na ia talia ai lona mana’o ia faia se fa‘amasinoga mo ana mea totino. Ia manuia tele outou le fanau.. Amene.

GALUEGA FA'ATINO: (FESILI ma TALII)

- **Aiseā na alu ai le fafine ma fa'asoesā i le fa'amasino amioletonu?**
Ina ia faia e le fa'amasino amioletonu se fa'amasinoga mo ana mea totino
- **O le a le uiga o le upu fa'asoesā?**
O le alu soo, e le malolo alu ma faatauanau se isi i sona manaoga o iai
- **O le a se a'oa'oga mai le tala sa fa'amatalaina?**
(tu'u le avanoa mo le faasoaa fanau)

PESE: Ua na o ia o lo'u manao
Iesu ua na o ia o lo'u manao

Ia manuia lenei Aso Sa



ASO SA: ME 24, 2026

MATAUPU: "E le fa'atauina i tupe le Agaga Paia" (Aso Sa Penetekoso)

TAULOTO Luka 18:1 'Ua ta'u atu e Iesu lenei tala fa'atusa e a'oa'oa atu ai 'iā te i latou, 'ina 'ia tatalo pea lava pea, 'ae 'aia le fa'avaivai.

SINI: Ia malamalama fanau e le fa'atauina i ni tupe le Agaga Pa'ia o le Atua e fa'avavau.

FESOASOANI MO LE FAIAOGA: E ofo alofa ma fa'atalofa atu ia outou Susuga i Faiaoga i lenei vaega o lau tapenaga mo le fanau. Malo lava le onosa'i ma le fa'apalepale i o outou gafa tausii auā le Atua ma lana galuega. Ia ua manatu o se Aso Sa taua foi lenei i le tala fa'asolopito o le Ekalesia ma le fa'asolo mai o lana galuega lea lava ua o'o mai i o tatou vaitau. Taumafai pea ia iloa ma malamalama le fanau e le o se mea e fa'atauina le Agaga Pa'ia, o ia lava o le Atua na te tauto'aluina o tatou tagata i fita ma fa'afitauli o le savaliga o lo'o tatou aga'i iai. Ua manatu lava, e na o se amataga e tata'i iai la outou folasaga, mo lenei Aso Sa o le Penetekoso. E iai le manatu e fa'aauau pea a tatou tauloto mai Aso Sa ua tuana'i atu, mo le taulotoina e nai fanau ia mautu ma taofi ai e latou mau mai le Tusi Pa'ia. Ia manuia a outou tapenaga mo le Aso Sa o le Penetekoso. God Bless!.

FESOASOANI MO LE MATAUPU: O ai e na te ta'u mai po'o iai se mea taua o lo'o fa'amanatu i le Aso Sa lenei. Ioe, o le Aso Sa o le Penetekoso, lea e fa'ataua e i tatou ma le lalolagi atoa, o le Aso na Afio ifo ai le Agaga Pa'ia i luga o ona so'o. O le tatou lesona la o le taeao lenei, E le fa'atauina i tupe le Agaga Pa'ia. Ina ua fa'alogoa Aposetolo i Ierusalemua ua talia e tagata Samaria le afioga a le Atua, ona latou 'auina atu lea o Peteru ma Ioane iā i latou; ua o'ifo i la'ua ma tatalo ina ia maua e i latou le Agaga Pa'ia. Auā e le'i liligi ifo i se tasi o i latou le Agaga Pa'ia, ae ua na o le suafa o le Alii o Iesu ua papatisoina ai i latou. Ona fa'ae'e atu lea o o la lima iā i latou, ma na latou maua ai le Agaga Pa'ia. Ina ua iloa e Simona e maua le Agaga Paia e ala i le fa'ae'e o

lima o Aposetolo, ona ia ofo atu lea o tupe iā i la'ua, ua fa'apea mai: "Ia aumai fo'i iā te a'u lenā pule, ina ia maua ai e se tasi e fa'ae'e i ai o'u lima le Agaga Pa'ia." Ia ua va'ai la tatou fanau, i le mata'utia o le vaega lea o le tala, lea ua mana'o e fa'atau i tupe le Agaga Pa'ia, o le meaalofo sili a le Atua, e na te tauto'aluaina i tatou i mea uma tatou te vaivai ai. Ae ese le matagofie o le tala a Peteru, ua fai atu Peteru iā te ia: "Ia fano au siliva fa'atasi ma oe, auā ua e manatu e mafai ona e maua le meaalofo foa'ifua a le Atua i tupe. E leai sau vaega po o sou tofi i lenei mea, auā e lē tonu lou loto i le silafaga a le Atua." O lea la, inā salamō ia i lou leaga, ma ia fa'atoga atu ia i le Alii ina ia fa'amagalo oe pe afai e mafai, ona o manatunatuga leaga o lou loto." Auā ua ou iloa, o oe o le mea o'ona ma o se pologa i le amiolētonu." Ua tali mai Simona: "Ia oulua fa'atoga atu i le Atua mo a'u, ina ia aua ne'i o'o mai iā te a'u se tasi o mea ua oulua fai mai ai." Ioe fanau, e le fa'atauina le Agaga Pa'ia o le meaalofo a le Atua ia i tatou ma le lalolagi o tagata e fa'atuatua ma talitonu ia te Ia, o le Tamā le Alo ma le Agaga Pa'ia. 'Aua nei galo o le taua lea o le Aso Sa lenei o le Penetekoso, o le Aso Sa e fa'ataua ai le mafutaga ma le Agaga Pa'ia o le Atua, na ia foa'i mai e tauto'aluaina o tatou tagata fa'atauva'a ina ia mafai ona tatou galulue ma le fa'amaoni, e tautua lana Talalelei. Ia manuia tele outou le fanau.. Amene.

GALUEGA FAATINO: (FESILI ma TAL)

- 1. O ai le Agaga Pa'ia?**
O le Agaga Pa'ia, o le lona tolu o Peresona o le Atua.
- 2. O le a le galuega a le Agaga Pa'ia o lo'o fai ia i tatou?**
O le Agaga Pa'ia, o ia e tauto'aluaina o tatou tagata fa'atauva'a.
- 3. O a ni a'oa'oga ua tatou maua mai i lenei tala**
... (tu'u le avanoa mo fa'asoa a fanau)

PESE: (tusi pese efkas #92)

Ia manuia le Aso Sa o le Penetekoso

ASO SA: ME 31, 2026

MATAUPU: MATAUPU FA'AMANATU O ME – MATAUPU - 1,2,3,4

FESOASOANI MO LE MATAUPU:

E fa'atalofa atu ia outou Susuga i Faiagoa i le fa'aiuga o lenei masina. Manatu foi o lea ua avatu se fa'ata'ita'iga mo a tatou fa'amanatu masani o fa'ai'uga o masina ta'itasi, ae o fesili na sa tu'uina atu mo a tatou lesona sa fa'atinoaina, peita'i, e tu'uina atu pea ia outou Susuga, ina ia faaopoopo ane ni a tatou fesili ia o gatasi ma a outou tapenaga sa feagai ai ma nai fanau i lenei masina. Ia manuia Suega a fanau mo lenei Aso Sa. God Bless!

FESILI:

1. **Aiseā na manao ai Iesu e asiasi ane i le taelega i Petesa?**
Ua silafia e Iesu, o lo’o iai tagata o lo’o mo’omia lana fa’amalologa.
2. **O le a le uiga o le Taelega i Petesa?**
O le Fale o le alofa mutimutivale.
3. **Fa’amatala le tinā lea sa sa’ili ia Iesu mo se faamalologa o lana tama teine?**
O le tinā e finau, ma le fa’atuatua ma talitonu i lona Alii
4. **O le a se naunautaiga sa i lenei tinā mo lana tama teine?**
Ia fa’amaloloina e Iesu ma ia tuli ese le agaga leaga sa nofo ai.
5. **Aiseā na alu ai le fafine ma fa’asoesā i le fa’amasino amioletonu?**
Ina ia faia e le fa’amasino amioletonu se fa’amasinoga mo ana mea totino
6. **O le a le uiga o le upu fa’asoesā?**
O le alu so’o, e le malolo alu ma fa’atauanau se isi i sona mana’oga o iai
7. **O ai le Agaga Pa’ia?**
O le Agaga Pa’ia, o le lona tolu o Peresona o le Atua.
8. **O le a le galuega a le Agaga Pa’ia o lo’o fai ia i tatou?**
O le Agaga Pa’ia, o ia e tauto’aluaina o tatou tagata fa’atauva’a

Ia manuia Suega o lenei Aso Sa



ASO SA: IUNI 07, 2026

MATAUPU: “O le fa’aaliga na iloa e Peteru”

TUSI FAITAU: Galuega 10: 9-16

TAULOTO: Filipi 3:13. “Le ‘au uso e, ‘ou te lē manatu ‘ua ‘ou maua, a o le mea e tasi ‘ou te faia, ‘ou te

fa’agalogalo i mea ‘ua tuana’i, ‘ou te momo’e punou a’i fo’i i mea o lumana’i.

Sini: Ia malamalama fanau i uiga o le miti a Peteru, ma le fa’aaliga mai le Atua.

FESOASOANI MO LE FAIAOGA: Fa’atalofa ma ofo alofa atu ia outou Susuga i Faiaoga, malo le onosa’i malo le lava-papale i le galuega ua vala’auina ai lo outou soifua e le Atua. E manatu lava ua maua se fa’asiliga malosi o le tino mai feau ma galuega sa feagai ai. Ae alo ane loa mo le fa’aauauina o la tatou galuega masani mo nai fanau. E fautuaina lava le tauloto e fa’amasani ai nai fanau, ina ia tauloto pea le tauloto mai le Aso Sa ua tuana’i atu. Ae afai lava e tou te mananao e sui, e le afaina lena mo a outou tapenaga. O le tala masani lava i le

TAULOTO: **Filipi 3:13** Le 'au uso e, 'ou te lē manatu 'ua 'ou maua, a o le mea e tasi 'ou te faia, 'ou te

fa'agalogalo i mea 'ua tuana'i, 'ou te momo'e punou a'i fo'i i mea o lumana'i.

Sini: Ia malamalama fanau i le manuia o le tagata e ola ma fa'amoemoe i le Agaga Paia o le Atua'

FESOASOANI MO LE FAIAOGA: Fa'atalofa ma fa'afeiloa'i atu ia outou Susuga i Faiaoga. Manatu o lea ua tatou o'o mai i le toe masina o lenei 'afa muamua o le tausaga. Peita'i, ua manatu e fai ni nai fesili e fa'atupu manatu mo le lesona, ona o le Aso Sa o Tamā, ina ia tatala ai la outou tapenaga. A e tu'uina atu lava le fa'atuatuga iā outou Susuga i Faiaoga, auā le fa'amoemoe mo nai fanau. O Fesili e tata'i i ai manatu o fanau mo le lesona, aemaise le Aso Sa o Tamā. **O ā gaoioiga fa'apitoa e mafai ona e faia ina ia maua ai se Aso Sa o Tamā fiafia mo lou Tamā, le Tamā o lou Tinā ma lou Tamā, po'o nisi lava o lo'o e fa'atamā i ai? E iai ni feau e masani ona fai e lou Tamā e mafai ona e fesoasoani iai, ae malolō ia? Po'o se mea e momo'o i ai lona loto e mafai ona e faia e fa'afiafia ai si ou Tamā?** Ia, ta'oto atu pea nai amataga na, ae ua outou masani i fa'atinoga o auala faigofie mo le mataupu. Ia manuia tapenaga o lesona i lenei Aso Sa. Manuia le Aso Sa o Tamā. God Bless!

FESOASOANI MO LE MATAUPU: O ai se tasi na te iloa se mea lelei e fa'atautu i le Aso Sa lenei. (tu'u se avanoa mo nai fanau, a ma'ea ona fai lea o ni nai fesili ma fa'atalatalanoa mo le taua o le Aso Sa o Tamā) Ioe, o le Aso Sa lenei e fa'atauaina ai le tautua a nai o tatou Tamā, ma la latou galuega o lo'o tausisi ma fafaga ai i tatou i aso ta'itasi o lo tatou ola. I le tusi sa tatou faitauina o lo'o fa'amatalaina ai e Paulo, se va'aiga o lo'o fa'a'ailoa ai e fa'apea, e leai se fa'amasinoga mo i latou ua ola ia Keriso Iesu, ona ua sa'oloto i latou mai le tulafono o le agasala ma le oti, peita'i, afai ua ola i le Agaga, ia fa'atumauina lava lea i totonu ia te i latou. O le uiga lena, e ala i le fa'atuatua ia Iesu, ua mafai ai e le tagata ona ola i se olaga e le pulea e le tino ma le agasala, ae ua ta'ita'ia e le Agaga Pa'ia i se olaga fou ma le ola fou mai i le Atua. Ioe, e maua e le tagata Kerisiano le malosi fa'aleagaga e ala i le Agaga Pa'ia o lo'o nofo i totonu ia te ia, e manumalo ai i le natura agasala ma ola ai i se olaga fou o le usi'usita'i ma gaua'i atu ia Iesu Keriso, e le pine ona ia maua ai lea o fa'amanuiaga o le ola, e mafuta ai pea ma le Agaga Pa'ia o le Atua e fa'avavau. Fanau e, i lenei taeao fou, e iloa gofie le tama ma le teine, e alofa i lona tamā ma lona tinā, e sau e fa'alogo ma usita'i, e agamalu ma loto mauualalo. Aisea?.. O uiga na o le tamaititi ua ola i le ta'ita'iga a le Agaga Pa'ia o le Atua, e le fa'amaualuga, pe losilosivale, ae fifilemu ma fa'alogo e usita'i i ona matua, o tamā ma tinā fa'apea tagata matutua e ava ma tautala fa'aaloalo i so'o se tagata. Aua o ona foliga va'aia, o foliga va'aia foi ia o nai ona matua sa a'oa'oina ma fa'atonu mai ai lona olaga talavou. Ia manuia tele outou le fanau. Manuia le Aso Sa o Tamā.. Amene.

GALUEGA FAATINO: (Tusigatala/Solo) mea e fa'aaogaina: peni & api

PESE: Ou te tula'i ma savali, ta'u atu lou suafa,

Logo atu i ou aiga e mata'utia le mana.

Ia Manuia tele le Aso Sa o Tama 2026

ASO SA: IUNI 21, 2026

MATAUPU: “Tau o Iesu e naunau iai”

TUSI FAITAU: Filipi 3: 12-16

TAULOTO: Filipi 3:13. “Le ‘au uso e, ‘ou te lē manatu ‘ua ‘ou maua, a o le mea e tasi ‘ou te faia, ‘ou te

fa’agalologo i mea ‘ua tuana’i, ‘ou te momo’e punou a’i fo’i i mea o lumana’i.”

Sini: Ia malamalama fanau e taua le fautuaga a Paulo i lona tuana, e tapena ai lo latou lumanai.

FESOASOANI MO LE FAIAOGA: Fa’atalofa atu ia outou Susuga i Faiaoga i leni vaega o le tapenaga mo fanau, malo le soifua manuia, malo foi le onosa’i i faiva ma tiute o lo outou vala’auina mo le Atua ma lana galuega. E iai le talitonuga ua maua se fa’asiliga-malosi mai feau ma galuega o lena vaiaso ua tuana’i atu. Ia ae saga’i ane loa mo le tapenaga o leni Aso Sa. E taumafai lava e avatu nai amataga ia ina ia tata’i ai so outou finagalo mo la outou tapenaga, ae ta’oto atu pea ia outou Susuga, e fa’aatoa ane se taumafaiga ua tu’uina atu. O lo’o fa’aaogaina lava le tauloto mai le amataga o leni masina, lea ua tualuga i le toe lesona lea o leni ‘afa tausaga, ona tapena ai lea o nai fanau mo la latou Su’ega fa’ai. Ia manuia tapenaga uma. God Bless!

FESOASOANI MO LE MATAUPU: O le tatou lesona i leni taeao, “Tau o Iesu e naunau iai” Ioe, o ai e ana ia upu fanau. Lelei tele tatou, o upu ia a Paulo lea sa fa’amatalaina mai le tusi sa tatou faitauina, o lo’o tautala ai Paulo e fa’atatau ia te ia lava, i lona toe to manatu i le soifuaga sa ia soifua ai i le taimi ua tuana’i. Ua ia fa’atusa ai o ia i se tagata tamo’e, i le tele o faigata sa fetaia’i ma ia i le ala. A o ia faigata ma tiga ua fai lea ma mea e fa’alagolago iai a’o fa’aauau pea lana tamo’ega, se’ia taunu’u i le nofoaga ua fa’atulagaina e Keriso Iesu mo ia, a o lona lea naunauta’iga ia tau lava o Iesu ma lana savaliga. O le fa’amamafa a Paulo o le aoga o mea ua ia iloa mai i le taimi ua tuana’i, ua fai lea ma a’oa’oga lelei i lona soifuaga i le taimi nei. I se isi fa’aupuga, o mea sa tutupu i lona soifuaga i le taimi ua fano, aua nei fa’agaloina, pe tu’u’esea, a ia fai lea ma fa’ailoga ina ia manatua pea le alofa le mavae o le Atua mo ia. Ioe, le fanau o i tonu lava lea e manatua ai tima’iga a nai o tatou matua, lo latou naunau ina ia tutupu a’e outou le fanau ia outou iloa le alofa o le Atua i le faigata o le ala na latou asaina mai i aso ua mavae atu. O mea lelei uma sa latou faia ina ia outou iloa ai, ia fai lea ma fa’ata’ita’iga i lo outou soifua taumafai le fanau. Ae o’o foi i mea lē lelei, ia fai lea ma fa’ailoga e tou te iloa ai, o le Atua, o le Atua fa’amagalo, o le Atua e tu’u avanoa pea ia i tatou uma lava. E le gata i lea, a ia fai ma a’oa’oga ina ia aua nei lavea i tatou i fili o le ala. O lona uiga e tele le aoga o lo tatou tuana’i, e faigofie ai e i tatou ona tamomo’e punoua’i ma taumafai pea ina ia fa’alautele le malo o le Atua i le lalolagi nei. Fai mai Paulo, E leai se isi mea e sili atu nai lo leni, “Tau lava o Iesu ia ou naunau iai” E le taumate e tofu lava le tagata ma lona tuana’i, i le

tele o mea lelei na tatou faia, a'o mea foi e le talafeagai ma le finagalo o le Atua. Ua fa'amanatu mai le Aposetolo, aua nei o tatou fa'agaloina o tatou taimi ua fano, a ia avea ma lu'i o le soifua fa'aaogaina i le taimi nei. Ia avea ma ala e iloa ai oe ua ia Keriso. O le mea lea e tatau ai ona tatou olioli e le aunoa, aua o Iesu lava ia na auai ma i tatou i le tuana'i, le taimi nei, e o'o lava i le fa'avavau. Ia manuia outou le fanau i le alofa tausii atu o le Atua..Aua nei galo. **"Tau lava o Iesu ia outou naunau iai"** Amene.

GALUEGA FA'ATINO: (FESILI ma TALI)

- O le a se mea taua o le tusi a Paulo i le Ekalesia i Filipi?
Fa'amalosi'au, ia olioli i le Alii, ma ia tau lava o Iesu e naunau i ai.
- O le a se fa'amalosi a Paulo mo le taimi nei?
Fa'agalo mea ua tuana'i, ae tamo'e punoua'i mo le lumana'i
- O le a se a'oa'oga sa maua mai i le tala sa fa'amatalaina?
(tu'u le avanoa mo le fa'asoa a fanau)

PESE: This little light of mine, Le malamalama laititi.

This little light of mine, Im gona let it shine.
This little light of mine, Im gonna let it shine.
This little light of mine, Im gona let it shine,
Let it shine, let it shine, let it shine.

Ia manuia lenei Aso Sa



ASO SA Iuni 29, 2025

MATAUPU: Su'ega Fa'ai'u.

FA'AFETAI MA FA'AMANUIAGA MO FAIAOGA: Fa'atalofa atu ia outou Susuga i Faiaoga. Malo le fa'amalolosi, malo fo'i le onosa'i i la tatou pito-la'au sa feagai ai ma le 'afa muamua o lenei Tausaga 2026. Tatalo lava ia fa'amalosi pea o outou loto e fiafia e galulue i lenei galuega fa'a-Faiaoga Aso Sa. Ma ia outou mautinoa, e le 'auāoa le lagi i le silafaga a le Atua o lē ana le galuega i lo outou soifua fa'aaogaina mo ia ma lona finagalo. Talosia ia 'augofie pea o outou finagalo e faitau ma su'esu'e i Afioga Paia a le Atua, ina ia fa'aosofia pea o outou loto ma agaga e tautua i le Atua e ala i lenei galuega ua vala'auina ai lo outou soifua ma lo tatou ola.

E iai le talitonuga o le Ofisa, o le a taoto atu i a outou Susuga i Faiaoga, ni fesili e tapena ai **Su'ega Fa'ai'u** mo nai fanau ma ia latou maua pea le fiafia e auai mai i le Aoga Aso Sa, ae ia silisili ai, ona o latou olioli ma ia fiafia i ala o le Alii sa a'oa'oina mai ai latou i lenei Tausaga Aoga 2026.

Ia manuia le feagai ai o Fanau, aemaise a outou Susuga i Faiaoga ma malologa o le ‘afa muamua o lenei Tausaga 2026. O le tatalo. Ia i luga ia te outou uma lava, le manuia ma le alofa tunoa o le Atua e fa’avavau. Manuia le alo atu o le Ekalesia I lana fonotele – 2026.

Ia Manuia Malologa o lenei Afa Tausaga 2026





Tautua Printing Press
1 Kanana Fou St, P.O. Box 1537
Kanana Fou, American Samoa 96799
(684) 699-9810
<https://efkas.org>